

۱۳۳۰

والله يهدي من يشاء الى صراط مستقيم

دینی ، علمی ، ادبی ، سیاسی ہفتہ لق مجموعۂ اسلامیہ در

اتبعون اهدكم سبيل الرشاد

صاحب و مدیر مسئول : ح . اشرف ادیب

جلد ۲ - ۹

۱۵ شوال ۱۳۳۰ پنجشنبه ۱۳ ایلول ۱۳۲۸

212-20 JLC

ایتالیانلر ایله ملاقات

کرك صوفیه ده، كرك فلبه ده اقامت ایتدیكم مدتیجه - اولجه ده سویلدیكم وجهله - متره پول هوتلنده قالدیم . فقط بیلیمم که تصادفیدر ، یوقسه نه در؟ هر ایکی هوتل ده ممالک عثمانیه دن طرد اولنان ایتالیانلر ایله ملاو برحاله ایدی، حتی فلبه ده کی هوتلده کلدیكم صیرالده ایتالیان غزته مخرلری ده وارایدی . بونلر ایله آره صیره بعض شیلر قونوشور ایدیسه مده پک او قدر اوزون قونوشمازدیم . برکون مراقایدرك بونلر ایله عریض و عمیق کورشمک و طرابلس غرب محاربه سینه دائر فکرلری نه مرکزده اولدیغی کلامق ایسته دم . برکون باقدم که بزه قومشو اوطنه نك اوکنه ، چقمش غزته اوقویور، هان بنده چیقوب نصل صلحه عائد برشیلر واری ؟ دیدیم . بزم قومشو کولومسه یه رك: خایر! خایر! جوانی ویرنجه: بن — بقالم نه دیه جک دیه — بزم غزته لر یازیور برقاق کونه قدر صلحك اساسی قرارلاشه جق ، حتی بوکون بوم ثله ایچون بزم هیئت وکلا اجتماع بیله ایده جک !.. دیدیم . بونك اوزرینه ایتالیان سونیه به باشلادی . بوئانده بری ده کلدی ، اوکاده بوخبری سویلدیم ، فقط او هیچ دوشونمیه رك شمدی قابل دکل صلح اولاماز ، ده پتوق وقت بوایش دوام ایده جکدر ، دیدی . ایسته بونك اوزرینه آره مزده شوپله جه برمحاوره جریان ایتدی : بن — سزجه نصل امید اولنیور . بو یاقینلرده دولتن آره سنده صلح قابلی، دکلای ؟

ایتالیان — بز دکل ، هرکس بیلیور که شمدی صلح قابل دکلدر . ده بونك آره سی پک زیاده اوزایه جکدر . چونکه ایتالیانك حال حاضرده کی تکلیفی قبول ایدرك صلحه کیرشمک حال حاضرده بولنان عثمانلی قاینه سی ایچون غیر قابلدر ، اگر بویله برصلحه کیریشه جک اولورسه ملنك اعتمادی غائب ایده جک واحتمالکه ملت غلیانه کلرك اختلال بیله چیقاراجکدر . ایسته بو کی ملاحظه لره بناء عثمانلی قاینه سی صلحه کیریشه میه جکدر . مع هذا بو قاینه یه ظهیر اوله جق بر مجلس مبعوثان کلیرده اونلر قرار ویررلرله اوزمان بلکه اوله بیلیر . بونك غیری صلح قابل دکلدر . فقط حکومت سابقه موقع اقتداردن سقوط ایتسه ییدی اوزمان ده چابوق ، احتمالکه شمدی یه قدر صلح اولاجقدی .

— سن نه سویلیورسك ؟ بزده اکثریتله بونك عکسی دوشنولیور . بزده اکثریت دیور که : اگر حکومت سابقه موقع اقتدارده اولسه ییدی قابل دکل صلح اولیه جق، یعنی طرابلس ویرلیه جکدی . فقط اونلر موقع اقتداردن سقوط ایدوب یرینه شمدیکیلر کلدیکی ایچون صلح اوله جق ، یعنی طرابلس ویرلیه جکدر . سز بونك عکسی سویلیورسكز .

— اگر داخلدن اختلال ظهوری ایتیه ییدی، حکومت سابقه موقع اقتداردن دوشمه مش اوله ییدی ارادت پک چوق کچمه دن ایتالیا حکومتی عثمانلرک دیلایکی کی صلحه کیریشه میه مجبور اولاجقدی . بناء علیه اوصورتله صلح قابل اوله رق آراسی پک اوقدر اوزامیه جقدی، فقط شمدی بو قابل دکلدر .

— ایتالیا حکومتی اجبار ایده جک سبیلر نه کی شیلردی ؟ — بونك باشلیجه برقاق سبی واردر: بر کره ایتالیا افلاس اتمک درجه سینه کلشدر ، که کندیسنه بانقله لر بیله پاره ویرمه مک باشلادیلر ، میلیونلرجه بورجه گرفتار اولدی . کرچه سزکده یوق دکل! بانقله لر سزه ده ویرمزلردی ؛ فقط سز ذاتی مصارف ایتیورسكز که . بزم هر شیدن فضله اوله رق برده اوقدر زرهیلریمز واردر که دکر اوزرنده کزیورلر، بونلرک هپسی دهشتلی پاره ایتیور . ده صوکره ممالک عثمانیه دن طرد اولنلرله آیده یوز طقسان ، ایکیوز فرائق قدر پاره ده صرف اولنیور . بونلرک جمله سی ایتالیان کیسه سندن ویریلیور . فقط سزک نه قدر مصارفکیز وار !!؟

برسبب ده واردر که اوده عثمانلی عسکرنده کی عزم وثبات، فدا کارلق، اطاعت . بن برایتالیان اولدیغم حاله دیورم که: دنیا ده عثمانلی عسکری کی صبرلی،

عزم وثبات صاحبی عسکر هیچ بریرده کورمدم . دکل بزده، بشقه دولتلرده بیله عثمانلی عسکرلری کی عسکر اولدیغی سویلیورلر . بونی هرکس اعتراف ایدر . زیرا هیچ بریرده کورولر که برعسکر ایکی سنه ، اوچ ، دورت ، بش حتی ایچانده التی ، یدی سنه عسکرلک ایتسونده اختلال چیقارمسون . اگر سزک داخل ممالککزده اغتشاش چیقمایه رق اعلان حربدن بری کوستر . دیککز ثباتده بر آز ده دوام ایدیکیز ایتالیا عسکرنده اغتشاش محقق ایدی . ایسته بونك ایچوندر که ایتالیا عقد صلحه مجبور اوله جقدی . فقط شمدی ایتالیا یکیدن ایدلندی . کندیه نده ظهورندن قورقدیغی برحالی سزه کوردی . بناء علیه قولای قولای صلحه راضی اولاماز . بونك ایچون محاربه دوام ایدر ، نا که کندی دیدیکنی یایدیروب طرابلسی آلنجه یه قدر ...

— سن نه سویلیورسك؟ عثمانلی قاینه سی طرابلسی ایتالیا یه رسما ترك ایتسه بیله عربلر کندی مملکتلرینی بر فرد قالمایجه یه قدر مدافعه ایده جکدر . بزبوکا تماماً قانعز . حتی بتون سوریه ومصر غزته لر ی بوکا دائر اوزون مقاله لر نشر ایدیورلر . طرابلس وبنغازی عربلری مقدس وطنمزدن برقاریش یر ویرمه جکیز دیه بار بار باغریورلر ، پروتستولر ایدیورلر .

— اگر محاربه میدانده ایلان برقاق کشی بورایه چاغریله جق اولورسه ایتالیا عربلری برکونده قانیرر . زیرا اوراده محاربه یی اداره ایدنلر برقاق عثمانلی ضابطندن عبارتدر . اگر اونلر بوکون بورایه کل ونلرده باقک ایتالیا عربلره نه روللر اوینار . ایتالیا ایچون اونلری کندیسینه جلب اتمک برکونلک مسئله در ، بناء علیه اونلر یالکز باشلرینه محاربه یه دوام ایده مزلر .

— بویله مدلتله دونه جک ضابط اساساً اورایه کیتمزدی . سینیور دوستم، ینه خولیایه دالمه . بومستله ده مجاهدین اراسنده ایرلیق احتمالی یوقدر؛ یا هپ برلکده اوله جکلر ، یا هپ برلکده الی الابد شان وشرفله یاشایه جکلر ...

احمد حمدی

هندستانه مخبر خصوصیمزده :

هند یولنده

۸

هلب — بئمار برطانیایی

۱۰ اغستوس تاریخیله (میاذین) قضا سندن انفکاکله ایرتسی کونی (صالحیه) یه واردیغمزده بوراده کی قوناقدی بویوک برقافله یه راست کلدک . خاک اطرافنده (عنیزه) قبیله سنک برقسعی چادر قوروب اغنام ومواشیلرله برابر بولنیورلردی . کیجه وقتی ایله (ابوکال) ه یتشوب صباح وقتنه قدر استراحت ایلدک . بوراسی قائممقاملق ایسه ده عمران ومدنیتدن پک بی بهره وبی نصیب برحاله در . صباحلین بورادن مفارقت ایده رك اقشامه طوغری (نهیه) موقعنه کلدک . بورادن کلیرکن یول ائاسنده بغداد والیسی جمال پک افندی یه تصادف ایتدک . مشارالیه ک معینده اوتوز قرق قدر ژاندارمه سواری ضابطان ونفرلرندن مرکب برآلای وارایدی . ایرتسی کونی (عانه) یه مواصلته قائممقامک نزدینه کیتدم . مومی الیه دور سابقده قسطنطنیه تبعید ایدلش بولندیغندن بنم منفارقیقم ایدی . افطاردن صکره خانه سینه کیدوب بعض اشراف محلیه ایله حاکم افندی یه تقدیم ایلدی . عانه دن (حدیثه) یه وبورادن (بغداد) موقعنه طوغری حرکت ایتدک . حدیثه فرات نهری کنارنده وغایت ای بر موقعده بولنیورایسه ده بغدادی ده هیچ برشی — تک بر فرسوده خاندن بشقه — یوقدر .

ایرتسی کونی صباح وقتی حرکتله ، (هیت) ه ایریشدک . بوراسی ده قائممقامقدر . فقط حسن طبیعت ونظافتدن اثر بیله یوقدر . بورا اهاالیسی اوقدر نظافته رعایتسز آدملر در که کثافت ایچون بر مکافات ویرلمک لازم کلسه